

禮記集說

廿三

鄭氏禮記集說

PDC

禮記集說卷二十五

歸安鄭元慶述

祭統第二十五

疏云按鄭目錄云祭統者以其記祭祀之本也統猶本也此於別錄屬祭祀 嚴陵方氏云祭法非不及義然以法爲主祭義非不及法然以義爲主祭統則統而論之無所偏主也 烏程韓氏云祭有法有義斯亦足以畢祭之說矣又曷言乎統哉或曰法與義皆統於心似也然而未盡也中出生心君子之志也志也者內也內無可助而正不可不求助志無容假而正不容不外假內統外志統物所謂心怵而奉之

以禮者歟惠可以觀政政一統乎祭也順所以立教
教一統乎祭也有倫有義順陰順陽治國之本亦統
乎祭也乃至器有鼎鼎有銘一稱而上下皆得微獨
身比焉亦以顯揚先祖明示後世亦無不統乎祭也
賜之天子是爲康公纂之至今所以重國祭之所統
蓋如此統之爲言卽備之爲義也備者百順之名然
則統之爲言統於順也 納蘭氏云鄭氏見篇內有
忠臣孝子其本一也及求助之本祭者教之本禘嘗
治國之本等語遂以本釋統字而近世徐氏又以統
指心而言祭有法有義皆統於心亦以篇內有祭之
心孝子慈孫之心等語故也然愚以爲皆非也夫統

者總統之義故易以乾元統天謂貫天德之始終也
春秋大一統謂天王爲列國之綱紀也此篇盡志盡
物官備具備惠術可以觀爲政廟中可以象竟內以
至祭有三重有十倫及於衛之鼎銘魯之重祭莫不
該載統括靡遺故名祭統非本與心之謂也

凡治人之道莫急於禮禮有五經莫重於祭夫祭者非
物自外至者也自中出生於心者也心怵而奉之以禮
是故唯賢者能盡祭之義

疏云此明祭祀於禮中最重唯賢者能盡祭義 慶
源輔氏云祭吾之誠敬耳凡在外之物所以將之而
已故曰非物自外至者也自中出生於心者也心怵

而奉之以禮外徇於物而內忘其心者有之矣故曰
唯賢者能盡祭之義禮義固由賢者出也故下文言
賢者之祭致其誠敬明薦之而已不求其爲者此所
謂能盡此祭之義也 京山郝氏云五經謂五品經
常之禮祭所以厚人倫也鄭引周禮吉凶軍賓嘉五
者恐未可據 松陵趙氏云物卽事也中與外對中
出在一時生心在平日此如根本旣厚生出萌芽自
有不能已者所謂義也怵驚動貌正心之生處心怵
而奉須想他平日得力何在方接得箇賢者 義兼
心與物但心盡而物自從之

賢者之祭也必受其福非世所謂福也福者備也備者

百順之名也無所不順者之謂備言內盡於己而外順於道也忠臣以事其君孝子以事其親其本一也上則順於鬼神外則順於君長內則以孝於親如此之謂備唯賢者能備能備然後能祭是故賢者之祭也致其誠信與其忠敬奉之以物道之以禮安之以樂參之以時明薦之而已矣不求其爲此孝子之心也

疏云此明祭祀受福是百順之理 嚴陵方氏云名生於實者也受百順之名以己有百順之實則神有百順之報可知雖曰非世所謂福是乃世所謂福也有衍而無耗之謂福故曰福者備也備者百順之名必曰百者舉其多且以成數言之猶百福百祿稱百

而已於鬼神君長言順則知所謂孝於親者亦順也
於親言孝則順於鬼神爲敬順於君長爲忠又可知
反覆言之者以見無不順而備故也致其誠則無妄
念致其信則無疑慮致其忠則無欺心致其敬則無
怠志四者祭之本所謂物者奉乎此而已所謂禮者
道乎此而已所謂樂者安乎此而已所謂時者參乎
此而已蓋物以將其意故曰奉禮以行其義故曰道
樂以樂其來故曰安時以節其中故曰參雖其如此
俱明薦之於其親而已不求其爲也明薦與明禋明
饗同義不求其爲者或爲己或爲人皆未免乎有所
爲檀弓曰唯祭祀之禮主人自盡焉耳其言正與此

合 慶源輔氏云必受其福以理必之也世所謂福則不可必也鄭謂孝子受大順之顯名非是名猶名言之名猶言備者百順之謂而已能備然後能祭則祭之必受福可知也經之所謂福具於未祭之前世之所謂福應於已祭之後 吳江徐氏云犧牲粢盛奉之以物也升降酌獻道之以禮也鐘鼓干戚安之以樂也祠禴嘗烝參之以時也 烏程韓氏云心者義所由生明乎孝子之心而義無不盡矣義在順備通篇只此兩字 納蘭氏云爲者但知爲私而不知爲公卽上文世之所謂福非無所不順之備福也應氏只言無求福之心混矣且祭祀不祈禮雖有此文

然周禮太祝有六祈小雅有以祈甘雨介黍稷穀士
女之詩頌亦有春祈秋賽之詩月令祈來年於天宗
則爲公者未嘗不求所不求者爲己之福耳應氏泛
引殊未精晰

愚按內盡於己者卽下文致其誠信與其忠敬
是也而外順於道卽下文奉之以物道之以禮
安之以樂參之以時是也其本一者皆順也上
則順於鬼神四句卽上文無所不順之謂備通
節只重此順備兩字

祭者所以追養繼孝也孝者畜也順於道不逆於倫是
之謂畜

疏云養是生時養親孝是生時事親親今既沒設禮祭之追生時之養繼生時之孝 石林葉氏云生可得而養死不可得而養則孝幾於絕矣故祭則追養以繼孝養之至則上而天道以順於鬼神下而人倫以不逆於君長亦寧神之大者歟 金華應氏云追其不及之養而繼其未盡之孝畜爲畜養之義

愚按孝者畜也畜者養也順於道卽上外順於道不逆於倫倫卽下文所謂十倫是也不逆卽順順於道不逆於倫是釋追養繼孝之義孝雖不止於養然祭亦有養之道焉故以畜訓孝劉氏以畜爲藏恐非是

是故孝子之事親也有三道焉生則養沒則喪喪畢則祭養則觀其順也喪則觀其哀也祭則觀其敬而時也盡此三道者孝子之行也

嚴陵方氏云以養志爲上以養口體爲下此養之順也發於聲音而見於衣服此喪之哀也所以交於神明者祭之敬也所以節其疏數者祭之時也觀者上下見之之謂觀其順則不順者亦可見矣觀其哀則不哀者亦可見矣以至敬與時皆然也 烏程韓氏云申說順字以孝養之順明追養繼孝之順

既內自盡又外求助昏禮是也故國君取夫人之辭曰請君之玉女與寡人共有敝邑事宗廟社稷此求助之

本也

註云言玉女者美言之也君子於玉比德焉 疏云

自此至祭之道也言孝子事親先能自盡又外求伉儷供粢盛之事 石林 采氏云娶妻非爲養而有時乎爲養所以外求助也 益宗廟之祭君牽牲夫人薦盎社稷之祭君耕以供 采盛夫人親蠶以爲祭服故曰共事宗廟社稷 嚴陵方氏云觀卷耳之詩后妃則輔佐君子求賢審官雞鳴之詩則夫人夙夜警戒有相成之道然婦之助天固不特在乎祭祀之時也此之所言亦以祭祀爲本故曰此求助之本也

夫祭也者必夫婦親之所以備外內之官也官備則具

備水草之菹陸產之醢小物備矣三牲之俎八簋之實
美物備矣昆蟲之異草木之實陰陽之物備矣凡天之
所生地之所長苟可薦者莫不咸在示盡物也外則盡
物內則盡志此祭之心也

註云水草之菹芹茆之屬陸產之醢蜺蜃之屬天子
之祭八簋昆蟲謂溫生寒死之蟲也內則可食之物
有蜩范草木之實菱芡榛栗之屬 嚴陵方氏云夫
婦親之若君制祭夫人薦盎君割牲夫人薦酒卿大
夫相君命婦相夫人此外內之官也官所以執事事
所以備物故曰官備則具備菹與醢類也故周官屬
醢人然以植物爲之則曰菹以動物爲之則曰醢水

草之菹卽七菹所謂茆菹芹菹之類陸產之醢卽七醢所謂兔醢雁醢之類然七菹又有葵菹之類不必皆水草七醢又有蟲醢魚醢之類不必皆陸產俎者三牲則入簋者五穀也言入簋則俎爲三俎矣言實則俎亦非虛矣俎所薦者天產故其數用三之奇簋所盛者地產故其數用八之偶於昆蟲草木言陰陽之物者蓋昆蟲以陰蟄以陽出草木以陰枯以陽榮故也然水草亦陰物也陸產亦陽物也三牲亦陽物也入簋亦陰物也止謂昆蟲草木爲陰陽之物者以用至於昆蟲之異草木之實而陰陽之物於是爲備故也故曰凡天之所生地之所長苟可薦者莫不咸

在示盡物也徒盡物於外而不能盡志於內亦不足以盡祭之心矣故曰外則盡物內則盡志此祭之心也烏程韓氏云申說備字天下未有志盡而物不盡者物不盡卽是志不盡故言此祭之心

是故天子親耕於南郊以供齊盛王后蠶於北郊以共純服諸侯耕於東郊亦以共齊盛夫人蠶於北郊以共冕服天子諸侯非莫耕也王后夫人非莫蠶也身致其誠信誠信之謂盡盡之謂敬敬盡然後可以事神明此祭之道也

疏云此覆結上文必夫婦親之及盡物盡志之事天子太陽故南郊諸侯少陽故東郊然藉田並在東南

故王言南諸侯言東后太陰故北郊夫人少陰合西
郊然亦北者婦人質少變與后同也 嚴陵方氏云
天子諸侯非莫與之耕王后夫人非莫與之蠶然且
親耕親蠶焉則以身致其誠信而已 山陰陸氏云
純言服冕言冠天子言所服諸侯言所戴亦言之法
鄭氏謂純服亦冕服也互言之非是知然者以天子
宜主言郊諸侯言廟知之 吳江徐氏云此未祭時
夫婦親之一也 京山郝氏云純如字讀與後純
冕同舊皆作緇者非

及時將祭君子乃齊齊之爲言齊也齊不齊以致齊者
也是故君子非有大事也非有恭敬也則不齊不齊則

於物無防也嗜欲無止也及其將齊也防其邪物訖其嗜欲耳不聽樂故記曰齊者不樂言不敢散其志也心不苟慮必依於道手足不苟動必依於禮是故君子之齊也專致其精明之德也故散齊七日以定之致齊三日以齊之定之之謂齊齊者精明之至也然後可以交於神明也

疏云自此至夫婦親之明將祭齊戒之義并明君與夫人皆致齊會於太廟夫婦交親行祭之義及時謂四時行祭之前未旬時也方將接神先宜整齊身心故齊也 嚴陵方氏云夫齊所以致一致一則不齊者齊矣齊固不止於耳不聽樂然樂者人之所樂也